




ՀԱՇՎԵՏՈՒ ԹՈՂԱՐԿՈՂԻ ՊԱՏԱՍԽԱՆԱՏՈՒ ԱՆՁԱՆՑ ՀԱՅՏԱՐԱՐՈՒԹՅՈՒՆԸ

Սույնով հաստատում ենք, որ մեր լավագույն տեղեկացվածության համաձայն՝ «ԱԿԲԱ ԲԱՆԿ» ԲԲԸ (այսուհետ՝ Թողարկող) 2026թ. միջանկյալ ֆինանսական հաշվետվությունները ճշգրիտ և լիարժեք ձևով արտացոլում են «ԱԿԲԱ ԲԱՆԿ» ԲԲԸ ակտիվների և պարտավորությունների, ֆինանսական վիճակի, եկամուտների և ծախսերի իրական պատկերը, իսկ կառավարման մարմինների 2026թ. 1-ին եռամսյակի զեկույցը ճշգրիտ և լիարժեք ձևով արտացոլում է Թողարկողի ընդհանուր վիճակը, բիզնեսի արդյունքները և զարգացումը ու ներառում է այն հիմնական ռիսկերի նկարագիրը, որոնց հետ առնչվում է «ԱԿԲԱ ԲԱՆԿ» ԲԲԸ-ն:

Հակոբ Անդրեասյան (անուն, ազգանուն)	Գլխավոր գործադիր տնօրեն (պաշտոն)	 (ստորագրություն) 20.05.2026թ. (ամսաթիվ)
Ստյոպա Զաքինյան (անուն, ազգանուն)	Գլխավոր գործադիր տնօրենի տեղակալ Ֆինանսական տնօրեն (պաշտոն)	 (ստորագրություն) 20.05.2026թ. (ամսաթիվ)
Արմեն Հակոբյան (անուն, ազգանուն)	Գլխավոր հաշվապահ (պաշտոն)	 (ստորագրություն) 20.05.2026թ. (ամսաթիվ)



«ԱԿԲԱ ԲԱՆԿ»

բաց բաժնետիրական ընկերություն

**ՄԻՋԱՆԿՅԱԼ ՀԱՇՎԵՏՎՈՒԹՅՈՒՆ
2026 ԹՎԱԿԱՆԻ 1-ԻՆ ԵՌԱՄՍՅԱԿԻ**

2026 ԹՎԱԿԱՆ

«ԱԿԲԱ ԲԱՆԿ» ԲԲԸ
ՀԱՇՎԵՏՈՒ ԹՈՂԱՐԿՈՂԻ ՄԻՋԱՆԿՅԱԼ ՀԱՇՎԵՏՎՈՒԹՅՈՒՆ

2026 ԹՎԱԿԱՆԻ 1-ԻՆ ԵՌԱՄՍՅԱԿ

Հաշվեկշռային հիմնական ցուցանիշներ

Հաշվետու ժամանակաշրջանի վերջի դրությամբ «ԱԿԲԱ ԲԱՆԿ» ԲԲԸ (այսուհետ՝ Բանկ) համախմբված ֆինանսական հաշվետվությունների հիման վրա ակտիվները կազմել են **1,091 տրլն ՀՀ դրամ**՝ նախորդ տարվա տարեվերջի նկատմամբ աճելով **23,3 մլրդ ՀՀ դրամով** կամ **2,2%-ով**:

31.03.2026թ. դրությամբ Բանկի ակտիվների կառուցվածքում գերակշռում են հաճախորդներին տրամադրված վարկերը (ներառյալ ֆինանսական վարձակալությունը)՝ կազմելով ընդհանուր ակտիվների շուրջ **69.2%-ը**: Նախորդ տարվա տարեվերջի համեմատ համախառն վարկային պորտֆելն աճել է **1,5 մլրդ ՀՀ դրամով** կամ **2,5%-ով**՝ կազմելով **755,4 մլրդ ՀՀ դրամ**: Հաշվետու ժամանակաշրջանի վերջի դրությամբ ընդհանուր պորտֆելում ՀՀ դրամով տրամադրված վարկերի կշիռը կազմել է **79,2%**:

31.03.2026թ. դրությամբ Բանկի դրամական միջոցները (կանխիկ միջոցներ, մնացորդներ ՀՀ ԿԲ-ում և այլ թղթակից բանկերում) կազմել են **79,8 մլրդ ՀՀ դրամ**՝ ապահովելով ընդհանուր ակտիվների **7,3%-ը**:

Բանկի պարտավորությունները նախորդ տարվա տարեվերջի նկատմամբ աճել են **15,7 մլրդ ՀՀ դրամով**՝ հասնելով **888,4 մլրդ ՀՀ դրամի**:

31.03.2026թ. դրությամբ Բանկի ավանդային պորտֆելը (ցպահանջ և ժամկետային) կազմել է **617,5 մլրդ ՀՀ դրամ**: Ընդ որում, ազգային արժույթով ներգրավված միջոցների կշիռն ընդհանուր ավանդային պորտֆելում կազմել է շուրջ **71.0%**: Ըստ ժամկետայնության կառուցվածքի՝ ժամկետային ավանդները զբաղեցնում են պորտֆելի **59,5%-ը**, իսկ ցպահանջ միջոցները՝ **40,5%-ը**:

Միևնույն ժամանակ, ՀՀ կենտրոնական բանկի, Կառավարության, այլ բանկերի և ֆինանսական կազմակերպությունների նկատմամբ պարտավորությունները 31.03.2026թ. դրությամբ կազմել են **182,9 մլրդ ՀՀ դրամ**:

Բանկի ընդհանուր կապիտալը 31.03.2026 դրությամբ կազմել է **202,5 մլրդ ՀՀ դրամ**՝ նախորդ տարվա համեմատ աճելով **7,6 մլրդ ՀՀ դրամով** կամ **3,9%-ով**:

Եկամուտների և ծախսերի հիմնական ցուցանիշներ

31.03.2026թ. դրությամբ Բանկի զուտ տոկոսային եկամուտները կազմել են **17,7 մլրդ ՀՀ դրամ**՝ նախորդ տարվա համադրելի ժամանակահատվածի համեմատ աճելով **17,9%-ով**:

Հաշվետու ժամանակահատվածում հաճախորդներին տրված վարկերի, փոխառությունների և ֆինանսական վարձակալության գծով ստացված տոկոսային եկամուտը կազմել է **26,9 մլրդ ՀՀ դրամ**, իսկ ներդրումային գործառնություններից ստացված եկամուտը՝ **2,9 մլրդ ՀՀ դրամ**:

Միևնույն ժամանակ, միջնորդավճարների գծով եկամուտներն աճել են **17,9%-ով** և կազմել **4,7 մլրդ ՀՀ դրամ**: Առևտրային գործառնություններից ստացված զուտ եկամուտը կազմել է **0,9 մլրդ ՀՀ դրամ**: Արդյունքում, Բանկի զուտ գործառնական եկամուտները կազմել են **11,9 մլրդ ՀՀ դրամ**:

Բանկի ընդհանուր վարչական և այլ գործառնական ծախսերը հաշվետու ժամանակաշրջանում կազմել են **9,5 մլրդ ՀՀ դրամ**:

31.03.2026թ-ի դրությամբ աշխատակիցների թիվը հասել է **1915-ի**:

2026թ. առաջին եռամսյակի ընթացքում Բանկի կողմից իրականացված զուտ մասհանումները կազմել են **2,3 մլրդ ՀՀ դրամ**:

Արդյունքում, 2026թ առաջին եռամսյակի տվյալներով Բանկն ապահովել է **7,6 մլրդ ՀՀ դրամի** զուտ շահույթ: Ակտիվների շահութաբերության (ROA) ցուցանիշը կազմել է **2,8%**, իսկ սեփական կապիտալի շահութաբերությունը (ROE)՝ **15,3%**, Ծախսեր-եկամուտներ հարաբերակցության ցուցանիշը (Cost-to-Income) աճել է մինչև **44.4%**:

Մրցակցային դիրքի վերլուծություն

31.03.2026թ. դրությամբ ՀՀ բանկային համակարգում գործել են 17 առևտրային բանկեր՝ շուրջ **550** մասնաճյուղերով և **17,000** աշխատակիցներով:

2026թ. առաջին եռամսյակի ընթացքում համակարգում արձանագրվել է ակտիվների **2,5%**, վարկային պորտֆելի **4,1%**, պարտավորությունների **2,2%** և կապիտալի **5,6%** աճ:

Նույն ժամանակահատվածում Բանկն ապահովել է ակտիվների **2,2%** և վարկային պորտֆելի **2,5%** աճ: Հաճախորդների նկատմամբ պարտավորություններն նվազել են **0,7%**-ով, իսկ կապիտալը՝ **3,9%**-ով: Տարեվերջի դրությամբ Բանկի շուկայական մասնաբաժինն ըստ ակտիվների կազմել է **8,3%**, ըստ վարկերի՝ **9,4%**, իսկ ըստ ավանդների՝ **8,2%**: Նշված բոլոր ցուցանիշների (բացառությամբ կապիտալի) , ինչպես նաև շահութաբերության գծով Բանկը եղել է Հայաստանի առաջատար բանկերի եռյակում:

Հիմնական մրցակցային առավելությունները

- **Կապիտալիզացիայի բարձր մակարդակ.** 31.03.2026թ. դրությամբ Բանկի կապիտալն աճել է **7,6 մլրդ ՀՀ դրամով**՝ կազմելով **202,5 մլրդ ՀՀ դրամ** (4-րդ տեղը համակարգում): Բանկի առաջին մակարդակի և ընդհանուր կապիտալի համարժեքության ցուցանիշները կազմել են համապատասխանաբար **19,4%** և **22,0%**, ինչը զգալիորեն գերազանցում է շուկայի միջին ցուցանիշները:
- **Առաջատար դիրք գյուղատնտեսական ֆինանսավորման շուկայում.** Բանկը շարունակում է հանդիսանալ Հայաստանի գյուղատնտեսության ոլորտի

խոշորագույն ֆինանսավորողներից մեկը՝ պահպանելով խոշոր մասնաբաժին շուկայում: Շնորհիվ տասնամյակների փորձառության և պետական սուբսիդավորման ծրագրերի արդյունավետ իրացման՝ Բանկն ունի գյուղատնտեսական ռիսկերի գնահատման և կառավարման եզակի գործիքակազմ, որն ապահովում է պորտֆելի կայունությունն ու շարունակական աճը:

- **Ամենաընդգրկուն մասնաճյուղային ցանցերից մեկը.** 31.03.2026թ. դրությամբ Բանկն ունի Հայաստանի ողջ տարածքում սփռված առավել լայն և աշխարհագրորեն դիվերսիֆիկացված մասնաճյուղային ցանցերից մեկը (66 մասնաճյուղ, որոնցից 2/3-ը՝ մարզերում): Սա հնարավորություն է տալիս ապահովել ունիվերսալ բանկային ծառայությունների հասանելիությունը նաև հեռավոր մարզային համայնքներում՝ ամրապնդելով հաճախորդների հետ անմիջական կապը և ապահովելով մրցակցային առավելություն ֆիզիկական սպասարկման շուկայում:
- **Թվային էկոհամակարգի և տեխնոլոգիական լուծումների զարգացում.** Ռազմավարական կարևորություն ունեցող «acba digital» համակարգի շարունակական կատարելագործումը թույլ է տվել Բանկին զգալիորեն բարձրացնել հեռահար սպասարկման տեսակարար կշիռը: Թվային գործիքների և բիզնես գործընթացների ավտոմատացման շնորհիվ Բանկն ապահովում է հաճախորդների փորձառության բարելավում և գործառնական արդյունավետության բարձրացում՝ արագ արձագանքելով շուկայի ժամանակակից պահանջներին:
- **ՓՄՁ հատվածի զարգացում և ոչ ֆինանսական ծառայությունների մատուցում.** Բանկը Փոքր և միջին ձեռնարկատիրության հատվածի համար հանդես է գալիս որպես ռազմավարական գործընկեր՝ առաջարկելով ոչ միայն ֆինանսական լուծումներ, այլ նաև բիզնեսի զարգացմանն ուղղված կրթական ծրագրեր: «Acba Business Club»-ի միջոցով իրականացվող անվճար դասընթացները նպաստում են հաճախորդների գործարար հմտությունների զարգացմանը՝ միաժամանակ բարձրացնելով հաճախորդների լոյալության մակարդակն ու վարկային պորտֆելի որակը:

- **ESG սկզբունքների ներդրում և «Կանաչ» ֆինանսավորման առաջնահերթություն.** Բանկն ակտիվորեն ներդնում է բնապահպանական, սոցիալական և կորպորատիվ կառավարման (ESG) միջազգային ստանդարտները: Միջազգային ֆինանսական կառույցների (EBRD, KfW, GGF և այլն) հետ հաստատված երկարամյա համագործակցությունը թույլ է տալիս ներգրավել նպատակային միջոցներ էներգաարդյունավետության և կայուն գյուղատնտեսության զարգացման ծրագրերի համար՝ Բանկը դիրքավորելով որպես առաջատար «կանաչ» ֆինանսավորման ոլորտում:
- **Թափանցիկության բարձր մակարդակ և հանրային ընկերության կարգավիճակ.** Որպես Հայաստանում առաջիններից մեկը IPO իրականացրած բաց բաժնետիրական ընկերություն՝ Բանկն ապահովում է թափանցիկության և կորպորատիվ կառավարման լավագույն փորձը: Բաժնետերերի լայն շրջանակը (այդ թվում միջազգային ինստիտուցիոնալ գործընկերոջ ներկայությունը) և միջազգային ստանդարտներին համապատասխանող հաշվետվողականությունը հիմք են հանդիսանում ներդրողների վստահության և Բանկի բարձր հեղինակության համար թե՛ ներքին, թե՛ արտաքին շուկաներում:

Միջազգային վարկանիշներ

2025 թվականի ընթացքում Բանկի ֆինանսական կայունությունն ու վարկունակությունը վերահաստատվել են աշխարհի առաջատար վարկանիշային գործակալությունների կողմից.

- **Moody's Investors Service.** Գործակալությունը Բանկին շնորհել է «**Ba3**» երկարաժամկետ վարկանիշ (Long-term deposit rating)՝ «**Կայուն**» (Stable) հեռանկարով: Այս վարկանիշն արտացոլում է Բանկի ամուր դիրքերը հայաստանյան շուկայում, կապիտալիզացիայի բարձր մակարդակը և իրացվելիության բավարար պաշարները:

- **Fitch Ratings.** 2025 թվականի փետրվարին գործակալությունը վերահաստատել է Բանկի էմիտենտի դեֆոլտի երկարաժամկետ վարկանիշը (Long-Term IDR) «**BB-**» մակարդակում, ինչպես նաև կենսունակության վարկանիշը (Viability Rating)՝ «**bb-**» մակարդակում: Վարկանիշների հեռանկարը գնահատվել է որպես «**Կայուն**»:

Հետագա զարգացման նկարագիր

Առաջիկա տարիներին Բանկը շարունակելու է իր գործունեությունը մանրաձախ, գյուղատնտեսական, ՓՄՁ և կորպորատիվ ուղղություններով՝ հիմնվելով հաճախորդակենտրոն, տվյալահեն և նորարար մոտեցումների վրա: Բանկի գործունեությունն ուղղված է լինելու ինչպես մատուցվող ծառայությունների շրջանակի ընդլայնմանը, թվային կարողությունների զարգացմանը, ծախսերի կրճատմանն ու ֆինանսական արդյունքների ամրապնդմանը, այնպես էլ սպասարկման որակի և հաճախորդների հավատարմության բարձրացմանը: Բանկը հանձնառու է պահպանել ամուր ներկայություն հաճախորդների բոլոր սեգմենտներում՝ կենտրոնանալով հաճախորդների ներգրավվածության խորացման, շահութաբերության բարձրացման և թվային բանկինգում իր առաջատար դիրքերի ամրապնդման վրա: Այսպես, Բանկը նախատեսում է հաճախորդների թիրախային ներգրավում՝ առաջարկելով անհատականացված սպասարկում, բացառիկ առաջարկներ և թվային (digital-first) լուծումներ: Զուգահեռաբար, շարունակվելու է թվային հարթակների կատարելագործումը և ֆունկցիոնալ հնարավորությունների ընդլայնումը՝ նպատակ ունենալով ապահովել արագ, հարմարավետ, անվտանգ և նորարար ծառայություններ: Ներդրվելու են առաջադեմ տվյալահեն և վերլուծական գործիքներ, ինչպես նաև անձնական ֆինանսների վերլուծական և կառավարման նոր հնարավորություններ, ինչը կապահովի առավել ամբողջական, նպատակային և անհատականացված փորձառություն բոլոր սեգմենտների համար:

Վարկային ներդրումները կշարունակեն հանդիսանալ Բանկի գործունեության առանցքային բաղադրիչներից՝ նպաստելով տնտեսության տարբեր ոլորտների կայուն զարգացմանը: Այսպես Բանկը շարունակելու է վարկավորուման ընդլայնում Հայաստանի ողջ տարածքում՝ ապահովելով տարբեր սեգմենտների համար ֆինանսական միջոցների առավել հասանելիություն: Վարկավորման ոլորտում շարունակվելու են գործընթացների ավտոմատացման, կատարելագործման և արդյունավետության բարձրացման ուղղությամբ գործունեությունը՝ հնարավորինս կրճատելով վերջիններիս գծով կատարվող գործառնական ծախսերը և ավելացնելով եկամտաբերությունը: Զուգահեռաբար, զգալիորեն կընդլայնվեն լիովին առցանց վարկավորման հնարավորությունները՝ ինչպես ֆիզիկական այնպես էլ իրավաբանական անձանց համար: Բանկը նախատեսում է ներդնել նոր վարկային պրոդուկտներ և նպատակային առաջարկներ՝ հարմարեցված տարբեր սեգմենտների առանձնահատկություններին՝ ապահովելով ավելի ճկուն և մրցունակ ֆինանսական լուծումներ:

Միննույն ժամանակ, Բանկի զարգացման կարևորագույն ուղղություններից է կայուն և դիվերսիֆիկացված ռեսուրսային բազայի ընդլայնումը: Այդ նպատակով Բանկը կշարունակի է ցպահանջ և ժամկետային ավանդների ներգրավումը ֆիզիկական և իրավաբանական անձանցից: Որպես խնայողական այլընտրանքային գործիք և կապիտալի շուկայի զարգացման կարևոր նախաձեռնություն՝ Բանկը կշարունակի դրամային և արտարժույթային պարտատոմսերի ակտիվ թողարկումը՝ ընդլայնելով հաճախորդների ներդրումային հնարավորությունները:

Ֆինանսական համակարգի գլոբալ տրանսֆորմացիոն միտումներին համահունչ՝ Բանկի ռազմավարական օրակարգում առանցքային տեղ են զբաղեցնում թվային փոխակերպմանը միտված շարունակական գործընթացները, նորարարական տեխնոլոգիաների կիրառումը և գործառնական արդյունավետության բարձրացումը:

Հաճախորդների վարքագծի փոփոխությունն ու տեխնոլոգիական արագ զարգացումը Բանկից պահանջում են ճկուն և առաջադեմ լուծումներ: Այս համատեքստում Բանկը

շարունակելու է ներդնել **ավտոմատացման և ռոբոտացման(RPA)** ժամանակակից գործիքակազմ՝ նպատակ ունենալով օպտիմալացնել ծախսերը, նվազեցնել մարդկային գործոնի հետ կապված ռիսկերը և բարձրացնել ընդհանուր արտադրողականությունը: Ջուզահեռաբար, արհեստական բանականության (AI) և մեքենայական ուսուցման (ML) կիրառումը հնարավորություն կտա Բանկին արդյունավետ որոշումներ կայացնել իրական ժամանակում՝ ապահովելով հաճախորդների կարիքների խորացված վերլուծություն և ավելի անհատականացված սպասարկում:

Բանկի թվային փոխակերպման ռազմավարության հիմքում է acba digital հարթակի զարգացումը, որպես երկարաժամկետ արժեք ստեղծող առանցքային ուղղություն: Բանկի նպատակն է ձևավորել թվային էկոհամակարգ, որտեղ հաճախորդները հնարավորություն կունենան մեկ հավելվածի միջոցով օգտվել իրենց կյանքի տարբեր փուլերին համապատասխան ֆինանսական և ոչ ֆինանսական ծառայություններից: Այսպես, Բանկը շարունակելու է ընդլայնել թվային հարթակներում իր առաջարկների ամբողջականությունը՝ համալրելով վարկային, վճարային, քարտային, ապահովագրական և ոչ ֆինանսական ծառայությունները ժամանակակից լուծումներով: Ինչպես նաև շարունակվելու են թվային օնբորդինգի հնարավորության ընդլայնումը՝ հատկապես երիտասարդ սերնդի, ինչպես նաև ՓՄՁ և կորպորատիվ հաճախորդների համար: Միաժամանակ, ներդրվելու են առաջադեմ վերլուծական գործիքներ օգտատիրոջ փորձառության, անհատականացված մոտեցման և ներգրավվածության բարձրացման ուղղությամբ, որոնք կապահովեն ավելի հարմարավետ, անխափան և բարելավված հաճախորդի փորձառություն:

Թվային լուծումների ակտիվ ներդրմանը զուգահեռ՝ Բանկը առաջնահերթություն է տալիս կիբեռանվտանգությանը և տվյալների պաշտպանությանը: Բանկը որդեգրել է կանխարգելիչ և համապարփակ մոտեցում՝ ներդնելով ժամանակակից պաշտպանական համակարգեր, ինչպես նաև բարձրացնելով աշխատակիցների և հաճախորդների

իրազեկվածությունն ու կիրժեռհիգիենայի մակարդակը: Այս մոտեցումը նպատակ ունի ապահովել անվտանգ, վստահելի և կայուն թվային միջավայր բոլորի համար:

Միաժամանակ, կզարգանա Բանկի սպասարկման էկոհամակարգը՝ հիմնվելով ավելի հարմարավետ, ճկուն և հաճախորդակենտրոն մոդելների վրա: Մասնաճյուղերում կհամադրվեն անհատական խորհրդատվությունն ու աշխատակիցների բազմաֆունկցիոնալությունը, ինքնասպասարկման և թվային աջակցության հետ՝ ապահովելով ավելի համապարփակ ու որակյալ սպասարկում բոլոր թիրախային սեգմենտների համար: Բանկը շարունակելու է նաև բարելավել հեռահար սպասարկման ուղիներն ու ենթակառուցվածքները՝ ապահովելով արագ, հետևողական և բարձրակարգ աջակցություն: Այս մոտեցումները հնարավորություն կտան բարձրացնել մասնաճյուղերի դերը՝ դրանք դարձնելով ավելի արդյունավետ համապարփակ խորհրդատվական կենտրոնների:

Բանկի զարգացման կարևոր բաղադրիչ է նաև կանաչ բանկինգի և Բնապահպանական, Սոցիալական և Կառավարման (ԲՍԿ) սկզբունքների հետևողական ինտեգրումը: Բանկի ԲՍԿ ռազմավարությունը առաջնորդվում է «Նպաստել Հայաստանի կայուն զարգացմանը» տեսլականով և հիմնված է այն սկզբունքի վրա, որ երկարաժամկետ բիզնեսի հաջողությունը պետք է համահունչ լինի շրջակա միջավայրի պահպանությանը, սոցիալական առաջընթացին և թափանցիկ կառավարմանը: Առաջիկա ժամանակահատվածում Բանկը կենտրոնանալու է իր հիմնական չորս՝ կլիմայի փոփոխության մեղմացում, ջրային ռեսուրսների կառավարում, աշխատավայրի բարեկեցություն ու աշխատանքային չափորոշիչներ, ինչպես նաև կառավարում և հանրային վստահություն ոլորտներում՝ պարտավորությունների առաջխաղացման վրա: Առաջիկա ժամանակահատվածում Բանկը կենտրոնանալու է կլիմայական ռիսկերի կառավարման, կանաչ վարկավորման և կանաչ պարտատոմսերի գործիքների ներդրման վրա՝ նպաստելով տնտեսության և հասարակության երկարաժամկետ ու կայուն զարգացմանը:

ՄԱԿՐՈՏՆՏԵՍԱԿԱՆ ՄԻՋԱՎԱՅՐ

2026 թվականի առաջին եռամսյակում ՀՀ տնտեսական միջավայրը շարունակել է գտնվել նախորդ տարվանից փոխանցված անորոշությունների ազդեցության ներքո: Վերջիններս պայմանավորված էին տարածաշրջանային ռազմաքաղաքական լարվածությամբ և առանցքային առևտրային գործընկերների հետ տնտեսական համագործակցության ծավալների նվազման միտումներով: Արտաքին առևտրի թուլացումը և Մերձավոր Արևելքում (մասնավորապես՝ Իրանի շուրջ) հնարավոր զարգացումների բարձր անորոշությունը հավելյալ ռիսկեր են ստեղծել մակրոտնտեսական կայունության համար:

Արտաքին հատված և դրամական փոխանցումներ

Ըստ ՀՀ ՎԿ-ի՝ 2026թ-ի հունվար-մարտ ամիսներին նախորդ տարվա նույն ժամանակահատվածի համեմատությամբ ՀՀ արտաքին եւ փոխադարձ առևտրի առևտրաշրջանառության ծավալը աճել է 4.6%-ով, ինչի մեջ իր նշանակալի ազդեցությունն է ունեցել ՀՀ-ՌԴ առևտրաշրջանառության ծավալի ավելի քան 17.2 տոկոս նվազումը:

Տնտեսական ակտիվություն և գնաճ.

Համաձայն ՀՀ ԿԲ տվյալների՝ 2026 թվականի հունվար-մարտ ամիսներին ֆիզիկական անձանց կողմից ՀՀ բանկերի միջոցով ՌԴ-ից ստացված և ՌԴ փոխանցված դրամական փոխանցումների զուտ ներհոսքը դոլարային արտահայտությամբ աճել է շուրջ 22.3 տոկոս նախորդ տարվա նույն ժամանակահատվածի համեմատ:

2026 թվականի հունվար-մարտ ամիսների ընթացքում նախորդ տարվա միևնույն ժամանակահատվածի նկատմամբ ՀՀ ՏԱՅ-ը գրանցել է 7.1% աճ, իսկ ծառայությունների և շինարարության ծավալները աճել են համապատասխանաբար 7.4%-ով և 22.2%-ով: Ի թիվս

վերոնշյալների՝ տարեկան աճ է գրանցել նաև տնտեսությունում առևտրի շրջանառության ծավալը՝ 2.1%:

2026թ. առաջին եռամսյակում պահպանվել է հարաբերականորեն կայուն գնաճային միջավայր և 12-ամսյա գնաճը կազմել է 5.3% (Ապրիլ 2026):

Տնտեսական հեռանկար.

Ըստ Economist Intelligence Unit (EIU) կանխատեսումների՝ առաջիկա երեք տարիներին ՀՀ ՀՆԱ-ի իրական աճը կպահպանվի կայուն տիրույթում՝ կազմելով համապատասխանաբար 5%, 4.6% և 4.3%*:

ՌԻՍԿԵՐԻ ԱՄՓՈՓ ԲՆՈՒԹԱԳԻՐ

2026թ. առաջին եռամսյակում Բանկը գործել է սահմանված ռիսկի ախորժակի սահմաններում: Կապիտալի համարժեքության նորմատիվի փաստացի արժեքը գերազանցել է ինչպես ներքին, այնպես էլ ՀՀ ԿԲ կողմից սահմանված նվազագույն շեմը: Բանկի ռիսկով կշռված ակտիվների գերակշիռ մասի աղբյուր է հանդիսանում վարկային ռիսկը, ինչը պայմանավորված է գործունեության հիմնական ուղղվածությամբ:

Բանկի չաշխատող ակտիվների ցուցանիշը 2026թ. առաջին եռամսյակի վերջի դրությամբ կազմել է 0.68 տոկոս՝ նախորդ տարվա առաջին եռամսյակի վերջի ցուցանիշի նկատմամբ նվազելով 0.26 տոկոսային կետով: Ընդհանուր վարկային պորտֆելի կենտրոնացումների մակարդակը՝ ըստ տնտեսության ճյուղերի և խոշորագույն հաճախորդների, գտնվել է սահմանված նպատակակետերի շրջանակներում: 2026թ. առաջին եռամսյակի վերջին իրականացված սթրես թեստերի արդյունքներով վարկային ռիսկի մեծությունը գտնվել է ընդունելի մակարդակում՝ հաշվի առնելով սթրեսային իրավիճակի հնարավոր ազդեցության և վերջինիս ի հայտ գալու հավանականության համադրությունը:

ՇՈՒԿԱՅԱԿԱՆ ՌԻՍԿ

Բանկի շուկայական ռիսկի հիմնական աղբյուրներն են արտարժութային փոխարժեքների և տոկոսադրույքների տատանողականությունը:

2026թ. առաջին եռամսյակի ընթացքում, ԿԲ-ի կողմից սահմանվող Վերաֆինանսավորման տոկոսադրույքը նախորդ եռամսյակի համեմատ մնացել է անփոփոխ կազմելով 6.5%:

Արտարժութային շուկայում ԱՄՆ դոլար/ՀՀ դրամ փոխարժեքը դրսևորել է ցածր տատանողականություն, իսկ Եվրո/ՀՀ դրամ և ՌԴ ռուբլի/ՀՀ դրամ փոխարժեքները ունեցել է առավել բարձր տատանողականություն՝ պայմանավորված ռուս-ուկրաինական հակամարտությամբ և միջազգային ֆինանսական շուկաներում դոլարի փոխարժեքի նկատմամբ եվրոյի արժույթի ուժեղացմամբ:

Արտարժութային ռիսկի պահպանողական քաղաքականությունից ելնելով՝ Եվրո և ՌԴ ռուբլի արտարժույթների գծով էական բաց դիրքեր չեն պահվել: ԱՄՆ դոլարով արտահայտված դիրքը հիմնականում եղել է կարճ, սակայն գտնվել է Բանկի կողմից ընդունելի մակարդակում:

2026թ. առաջին եռամսյակի ընթացքում արտարժույթի վերագնահատումից Բանկը կորուստներ չի կրել: Պարբերաբար իրականացվող սթրեսային սցենարների արդյունքում արտարժույթի վերագնահատումից հնարավոր կորուստները չեն գերազանցել սահմանված ռիսկի ախորժակի մեծությունները:

ԻՐԱՑՎԵԼԻՈՒԹՅԱՆ ՌԻՍԿ

2026թ. առաջին եռամսյակի ընթացքում Բանկը պահպանել է իրացվելիության բարձր և հուսալի մակարդակ, ինչն արտացոլվում է իրացվելիության նորմատիվների՝ ՀՀ ԿԲ սահմանած սահմանաչափերից զգալիորեն բարձր ցուցանիշով: Նույնիսկ արտաքին միջավայրից եկող անորոշությունների պարագայում Բանկի ավանդային պորտֆելի գծով

բացասական միտումներ չեն դիտվել: Հարկ է նշել, որ ընդհանուր պարտավորությունների կազմում ժամկետային ավանդների տեսակարար կշիռը կազմում է 63.43%:

Իրացվելիության աղբյուրների դիվերսիֆիկացման նկատառումներից ելնելով՝ Բանկը միջոցներ է ներգրավվում նաև միջազգային ֆինանսական կառույցներից, ինչպիսիք են ՎՋԵԲ, Proparco, Symbiotics, Triodos, EFSE և այլն:

Ավելցուկային իրացվելիության պաշարներն ուղղվում են ցածր ռիսկային ներդրումային գործառնությունների իրականացմանը, մասնավորապես՝ պետական պարտատոմսերում ներդրումների իրականացում, միջբանկային վարկերի տրամադրում, հակադարձ ռեպո գործարքների իրականացում և այլն: Բանկի ներդրումային պորտֆելում մեծ տեսակարար կշիռ են կազմում առավել բարձր իրացվելիություն ունեցող ՀՀ պետական պարտատոմսերը՝ կազմելով պարտատոմսերի պորտֆելի մոտ 97.04%:

Համաձայն Բանկի իրացվելիության սթրես թեստերի արդյունքների՝ Բանկի իրացվելիության մակարդակը գնահատվել է բավարար:

ՇՐՋԱԿԱ ՄԻՋԱՎԱՅՐԻ ԵՎ ՍՈՑԻԱԼԱԿԱՆ ՌԻՍԿԵՐ

Բանկի վարկային քաղաքականության հիմքում դրված է շրջակա միջավայրի և սոցիալական պատասխանատվության հայեցակարգը, որի շրջանակներում արգելվում է շրջակա միջավայրի վրա չափազանց բարձր ազդեցություն ունեցող գործունեության և նախագծերի ֆինանսավորումը:

ԳՈՐԾԱՌՆԱԿԱՆ ՌԻՍԿ

Բանկում գործում է գործառնական ռիսկերի կառավարման արդյունավետ համակարգ, որի հիմնական բաղադրիչներից են Գործառնական ռիսկի միջադեպերի

կառավարման գործուն մեխանիզմները և մշտական հսկողության համակարգի առկայությունը:

2021թ.-ից իրականացվում է Բանկի բոլոր գործընթացների վերլուծություն՝ ուղղված պոտենցիալ ռիսկերի բացահայտմանը: Պարբերաբար իրականացվում է Գործառնական ռիսկերի քարտեզի վերանայում՝ հիմնված նոր գործընթացների և գործընթացներում իրականացվող փոփոխությունների ուսումնասիրության, ռիսկերի բացահայտման վրա:

2022թ.-ից ստեղծվել և վարվում է գործառնական միջադեպերի բազա, որը հնարավորություն է տալիս արդյունավետորեն վերլուծել, գնահատել և բացահայտել առավել ռիսկային գործընթացները, վաղաժամ ահազանգեր ստանալ գործառնական ռիսկի միջադեպերի գծով, բարելավել ռիսկի զսպման մեխանիզմները և առավել թիրախային դարձնել մշտական հսկողության համակարգը: Ինչպես նաև Գործառնական միջադեպերի բազայում ներառված փաստացի պատահարների/միջադեպերի հիման վրա վերանայվում են նաև գործառնական ռիսկերի քարտեզում ներառված ռիսկերը, դրանց գնահատականները, և վերահսկողական գործիքակազմերը: Բանկում մշակվող հսկողական գործառնությունների ավտոմատացման և հաշվետվական համակարգը նպատակ ունի բարձրացնել հսկողության արդյունավետությունը, կրճատել աշխատատարությունը և նպաստել պոտենցիալ գործառնական ռիսկերի վաղաժամ հայտնաբերմանը ու կանխարգելմանը:

Տեղեկատվական անվտանգության և կիբեռանվտանգության հետ առնչվող ռիսկերի արդյունավետ կառավարումը հանդիսանում է Բանկի առանցքային բաղադրիչներից մեկը: Կիբեռապահպանման շարունակական աճի, թվային տեխնոլոգիաների զարգացման և բանկային ծառայությունների թվայնացման պայմաններում Բանկը հետևողականորեն իրականացնում է տեղեկատվական համակարգերի, ծառայությունների և բիզնես գործընթացների անվտանգության մակարդակի բարձրացմանն ուղղված ռազմավարական և գործառնական միջոցառումներ՝ ներդնելով ժամանակակից տեխնոլոգիական լուծումներ և կիրառելով տեղեկատվական անվտանգության ու

կիբեռանվտանգության միջազգային լավագույն փորձին և չափանիշներին համապատասխան վերահսկողական մեխանիզմներ:

Բանկի տեղեկատվական համակարգերի անվտանգության շարունակական բարձր մակարդակն ապահովելու, ինչպես նաև կիբեռմիջադեպերի հավանականության և ազդեցության նվազեցման նպատակով Բանկում ներդրված է կիբեռանվտանգության բազմաշերտ պաշտպանության (Defence in Depth) մոդել: Իրականացվում են տեղեկատվական ակտիվների շարունակական մոնիթորինգ, անվտանգության իրադարձությունների վերլուծություն, խոցելիությունների գնահատումներ, ներթափանցման թեստավորումներ, ինչպես նաև աշխատակիցների իրազեկվածության բարձրացման ծրագրեր: Միաժամանակ, առավել համապարփակ անվտանգության ապահովման նպատակով Բանկը համագործակցում է միջազգային առաջատար կազմակերպությունների հետ՝ իրականացնելով պարբերական ներթափանցման թեստավորումներ, և առաջադեմ մշտական սպառնալիքի (APT) սցենարների մոդելավորում: Նման մոտեցումը նպաստում է Բանկի տեղեկատվական համակարգերի դիմադրողականության բարձրացմանը և կիբեռանվտանգության ռիսկերի նվազեցմանը:

Բանկում գործում են ISO/IEC 27001:2022 տեղեկատվական անվտանգության կառավարման և ISO/IEC 27701:2019 անձնական տվյալների գաղտնիության կառավարման միջազգային ստանդարտներին համապատասխան հավաստագրված կառավարման համակարգեր, որոնց համապատասխանությունը պարբերաբար վերահաստատվում է ամենամյա վերահսկողական աուդիտների և վերահավաստագրման գործընթացների միջոցով: Բացի այդ, քարտային տվյալների պաշտպանության և վճարային համակարգերի անվտանգության ապահովման նպատակով Բանկը հավաստագրված է PCI DSS (Payment Card Industry Data Security Standard) միջազգային ստանդարտի պահանջներին համապատասխան:

Բանկը շարունակաբար վերանայում և կատարելագործում է իր կիբեռանվտանգության վերահսկողական միջավայրը՝ հաշվի առնելով կիբեռսպառնալիքների միտումները, կարգավորող պահանջները և միջազգային լավագույն փորձը:

Կիրթնանվտանգության ռիսկերի կառավարման հիմնական նպատակն է ոչ միայն նվազեցնել հնարավոր տեղեկատվական, ֆինանսական և հեղինակային կորուստները, այլ նաև ապահովել հաճախորդների վստահությունը, բանկային ծառայությունների կայունությունն ու Բանկի ռազմավարական նպատակների անխափան իրականացումը: